

碧落洞記

王陶

地之靈者以山水稱人之英者以文章顯故大塊間多巖壑勝槩非值通才碩賢跡所到心所想摘辭載實克播發之則雖駢奇粹異至於仙家所謂洞天福地相參亦不得有名於四方矣滇陽郡南趨十五里羣岫巨屬長溪縈紆窮河盡源呀然成洞中敞石室下逗寒流融糾萬狀衣冠輩未嘗一詣唐元和六年周夔羽皇探得幽絕遂命侶以游著到難一篇刊在巖石語清思逸狀寫景物至當後人嗣到稍稍甚易然奇文獨在無能可復繼者偽漢劉氏始題洞曰碧落室曰雲華自是益號名跡標望嶺隅南北來游無日無之予厭聞其勝患未得賞今還故里

道藏輯要

天下名山記
廣東碧落洞王

六

軫集六
X81

閒居多暇因率諸髦士偕至絕境稅駕暫息寓目一覽崖危壁峭駭動神魄風冷溜澈爽侵肌骨氣潤烟霧香馥松桂若登青岑造赤城霓旌可接飈馭可攀又豈止捐世紛脫塵累而已乎既而捫蘿設險周訪遺逸洗杯酌酒相陪夜飲歡而醉狂而歌濯足於清泉曲肱於磐石心境俱外物我皆忘浮圖非想之天老氏無何之鄉訂此冲寂彼焉此焉夫人生所樂爲趣匪一志尙於內情適於外是謂得矣顧不知逸少蘭亭之宴太白竹溪之會復何以專美於千百年間耶雲扃晚照促人歸轡猿鶴相顧戀戀不忍去者久之同遊九人各賦詩以寫興云